



Zidane France national team head coach kumogo

PM Modi-i Assam nung tzuimetsung tensa asadangogo

VOL. XXIII ISSUE NO. 286 (ADOK 286) DIMAPUR RASEMNÜ (WEDNESDAY) CHITENI (JULY) 29, 2026

₹ 5.00

NSF-i Nagaland Non-Government Educational Institutions (Regulation of Fees) latettsü ashir

Dimapur, July 28, 2026 (TYO): Naga Students' Federation (NSF)-i state sorkar dang Nagaland Non-Government Educational Institutions (Regulation of Fees) latettsü ayongzükogo.

Nagaland nung private aser professional educational institutions nung fees aser admissions tiptemtsü atema iba policy yanglutsüla. Iba ajangasa nija rejutem nung inyakba tesayurtem itasen tip atemtsüla kechiyong parnok tangutsü tim mangur ta NSF-i metetdaksüogo.

Reju lapokdak, infrastructure aliba, classes mesüra courses agütsüba, teaching & non-teaching staff qualifications, salary components & annual

increments, rejui sen bendenba nungi kaketshir ka dak senotsü endokba aser tanga inyakyimtem nung lateter policy tajung ka ajanga fees reprangshimla ta parnokisa ashi.

Ajisüaka, iba policy ya sendaktepa alir ajak tebilembatem angadanga sülen ang yanglutsüla ta NSF-isa metetdaksü.

NSF-isa sorkar dang ita ka tsüngda High-Powered Committee ka shima Nagaland Non-Government Educational Institutions (Regulation of Fees) Act renemtsü metetdaksüogo.

Parnokisa ita trok tsüngda Nagaland Non-Government Educational Institutions (Regulation of Fees) yanglua mapa tenzüksü metetdaksüogo.

Mkg DC-i 'travel advisory' metetdaksür

Dimapur, July 28, 2026 (TYO): Chuchuyimlang aser Unger yimtsüngtem tsüngda National Highway-02 (NH-02) kanga mejungi raksaa aliba atema 'travel advisory' ka metetdaksüogo.

Mokokchung Deputy Commissioner Ajit Kumar Verma, IAS-i senzisenbongertem kumzüka ayutsü aser traffic timtem malitsü atema tanga sangdong ka magütsü tashi 'New Traffic Regulations' alitsü ta shiogo.

Mokokchung district administration-isa senzisenbonger ajak dang item tetuyuba sülen anidaksü aser on-duty authorities den amaliteptsü mepishia metetdaksüogo.

Mokokchung Town nungi Tuli (To and Fro): Gari ajak Mokokchung Town - Impur

Junction - Longjang - Kelingmen - Tuli route len senzütsü.

Mokokchung Town nungi Chuchuyimlang Village (To and Fro): Mokokchung Town - Impur Junction - Yisemyong - Mongsenyimi - Chuchuyimlang route leni traffic melenshir.

Mokokchung Town nungi Changtongya Town: Changtongya leni aotsü atema Mokokchung Town - Impur Junction - Longjang - Kelingmen - Unger - Akhoya - Changtongya Town route amshitsü.

Changtongya Town nungi Mokokchung Town: Mokokchung-i meyipa aotsü atema Changtongya Town - Unger - Unger Local Ground - Chuchuyimlang/Kelingmen Junction - Mokokchung Town route amshitsü.

MP Supongmeren-i Emergency Relief meshir

Dimapur, July 28, 2026 (TYO): Lok Sabha MP S. Supongmeren Jamir-i Prime Minister Narendra Modi dang Nagaland nung lendong-tsüdong balala atema teyari meshiogo.

Nagaland kübok tesem balala nung aser talisa Mon o Mokokchung district tem nung tzunglu kanga aruba ajanga anentsüh aser tzuimetsung ajanga teraksa jenti bentsür aruogo. Lendong balala nung nisung takümtem samaogo, kiojen raksaaogo aser kiset shirurtem ponger ogo ta MP Supongmeren-i PM Modi dangi shidi ka züluogo.

District aika nung lenmang aser aputem kanga mejungi raksaba ajanga olioratsü makoker aser essential commodities agütsüba nung timtemer ta paisha ashi.

Talisa meta talang pilar alidak

nübortemi timtem tulu ajurua lir aser talisa kaketshirtem mesenzütetba den communication networks mali kumogo ta MP Supongmeren-isa shisem.

Indian Army indang helicopter services ajanga teyaru tulu agüja aruba atema pelar ta paisha ashi. "Nagaland nung item khuret angateta Prime Minister-i emergency relief measures sangdongtsü mepishir. Külen, India sorkaria rescue, rehabilitation, restoration of connectivity nung yaritepba den külemi lendong balala ajanga kongshia aliba kibongtem nem teyari agütsütsü ayongzüker" ta Supongmeren-isa metetdaksü.

Nagaland nung alirtemi iba tebilemstü khuret koktettsü atema Centre sorkar nungi teyari kanga nungdaka kumogo ta paisha ashi.

Governor Yadav-i Agriculture department den senden amen



July 28, 2026 nü Lok Bhavan, Kohima nung Governor Nand Kishore Yadav-i Agriculture Department den senden amendang agiba noksa ka angur.

Dimapur, July 28, 2026 (TYO): Nagaland Governor Nand Kishore Yadav-i July 28, 2026 nü Lok Bhavan, Kohima nung Department of Agriculture maparen meyipa reprangshiba senden ka menenogo.

Iba senden nung Department-i organisational structure, teinyakdak schemes & programmes, inyaktetbatem, tayongzükbatem aser Nagaland nung agriculture sector renloka aotsü indang tarutsü sentongtem lemsatop.

Parnokisa agricultural productivity nung department-i shilem agiba aser Centrally Sponsored Schemes o State ajanga aluyimer nem teyari balala agütsüba indang osang metetdaksü.

Nagaland nütsüng yongsük 70% shi ka aluyimba den

sendaktepa lir aser aluyimba nübotem rongnung tetsür 65% shi lir ta Department-isa ashi.

Senden nung Krishonnati Yojana, PM-Rashtriya Krishi Vikas Yojana (RKVY), National Food Security and Nutrition Mission (NFSNM), National Mission on Edible Oils, Mission Organic Value Chain Development for North Eastern Region (MOVCD-NER), National Mission on Natural Farming, PM-Kisan, Sub-Mission on Agricultural Mechanization (SMAM), Per Drop More Crop (PDMC), Rainfed Area Development, Agroforestry aser tanga mapatem meyipa reprangshia liasü.

Nagaland nung oil palm cultivation ulushiba, organic & natural farming ajungketba,

water harvesting infrastructure yangluba, farmer training & capacity building yariba aser market linkages tajungba akümba indang Department-i Governor Yadav dang ashi.

Senden nungsa ali kibur khuret, infrastructure peria maliba, tenem-tekong majungba den road connectivity tayongzükbata balala lemsatopa liasü.

Department-i state nung developmental programmes balala inyakba atema tenüngsang agütsür ta Governor Yadav-i ashi.

Paisa Department dang maneni inyakyim tasentem agizüka benshitsü, sendaktepa alirtem tsüngda amalitep tali alitsü aser agriculture tajungba kümdaksütsü ayongzüka liasü.

DDMA Mon-i tasür kinunger shia nem Rs 4 lakh teyari agütsü



Mon Deputy Commissioner & Chairman, DDMA Wennyei Konyak-i July 19, 2026 nü anentsüh lendong nung asür kinunger nem senotsü teyari agütsüdag agiba noksa ka angur.

Dimapur, July 28, 2026 (TYO): Mon jila kübok Thamnan Ward nung July 19, 2026 nü anentsüh lendong nung taküm samar nisung 8 kinunger nem senotsü teyari agütsüogo.

Mon Deputy Commissioner & Chairman, DDMA Wennyei Konyak-i SDRF norms nung aliba ama tasür shia nem Rs. 4 lakh agütsü.

Iba lendong nung tasürtem ya Thenkhao Konyak, Tingyuh Konyak, Taotun Konyak,

Toithron Konyak, Kenlong Konyak, Lunglei L. Konyak, Pangho Konyak aser Pomei Konyak nung liasü.

Tanü ADC & CEO, DDMA Mon, President, Konyak Union (KU) aser President, Konyak Students' Union (KSU) nung lia senotsü teyari agüja liasü.

Tasür kibongtem nem mapang shitak nung senotsü teyari agütsütsü atema Nagaland State Disaster Management Authority (NSDMA)-i DDMA,

Mon den yaritepogo ta ashi.

NSDMA-i Nagaland kübok tesem balala nung lendong atalokba tesemtem nung district administrations den amalitepa relief and rehabilitation teyari agüja arur ta parnokisa ashi.

Taküm tzungluruwa Nagaland kübok tesem aika nung lendong balala atalokogo. Tzunglu kanga aruba ajanga district aika nung anentsüh, ajungben tzuimetsung aser gari lenmangtem raksaa lir.

Dimapur nung Traffic Personnel atema ananü training agütsü



Dimapur nung Traffic Personnel atema training agiba mapang tangokba noksa nung angur.

Dimapur, Chiteni/July 28 (TYO): Commissionerate of Police, Dimapur ajanga Department of Emergency Medicine, Christian Institute of Health Sciences and Research (CIHSR), Chümoukedima den lungjemer lenmang nung lendong ajuruba nung mezüng telangzüba agütsür ama traffic personnel atema anogo ana training July 23-24, 2026 anogotem agia liasü, ta Commissioner of Police, Dimapur, Aotula T. Imchen, IPS ajanga sangdong ka nung ashi.

Iba training mapang traffic police tem dang lenmang nung gari lendong ajurur alirtem anepaluba yimya balala sayua liasü.

Tanen makai lenmang nung gari lendong ajuruba ajanga nisung takum aika samar aser aika teti asoshi matamabensai kumdahtsür. Aiben lendong ajuruli anepalu mesütetba mesüra yimya shidak amshia anepalu masüba ajanga asü-amaba mesüra teti asoshi matamabensai kumdahtsüba lir, ta sangdong nung ashi.

Aibel lendong atalokba tesem ya traffic personnel temi mezüng tonga aor aser lendong ajurur alirtem kumzükbä, agitetba, teyari agütsüba aser mozüki bushia anir aoba nung parnoki tongti shilem agir.

Parnok nem emergency care skills sayuba ajanga parnoki tongtipang 'golden hour'

mapang nüngdakba mera agia nisung takum kumzüktetsü aser matamabensai akumtsü aliba ajemdaktsüba nung yaritetsü, ta ashi.

Iba ama tongtipang inyakyim nung lungjemba asoshi Director aser CIHSR, Department of Emergency Medicine staff tem dang kanga pelar, ta CP Dimapur, Aotula T. Imchen-i ashi.

Iba sentong yagi Nagaland nung gari lendong ajurudang ajungben rongdak mapang telangzüba agütsüba tashi itshitsü aser trauma care tajungba akumtsü, ta lai ashi.

Iba training tatemi shilem agiba personnel 25 nem shilem agiba kulizüng kakat agüja liasü.

July 31 - Aug 3 tashi Longsa nung Tsüngremmung benjong ayonger

Mokokchung, 27th July, 2026: Department of Tourism, Government of Nagaland aküm kübok Longsa yimdeni ayongzüka 2026 Tsüngremmung benjong July 31st nungi 3rd August tashi Longsa Salang Lenden nung amungtsü kanga mazüngi inyakkaki ta osang ka ajanga metetdaksü.

Taküm iba sentong nung MLA & Advisor for Youth Resources & Sports (GoN), S. Keoshu Yimkhiung aser MLA & Advisor, Land Resources (GoN), G. Ikuto Zhimomi na tetushi tesemdanger, aser Nagaland RD & SIRD Minister Metsübo Jamir, tayonger tongti asütsü jaoka lir.

July 31st aonung Longsa Community Hall nung sobaliba kentenmenü tetoktepba sentong ka akatsü. Aug 1 nü Tsüngremmung sentong nung Longsa nungi telok balala den ano jangratemtsü kaji – Sangpur yim (Yimkhiung), Surumi yim (Sumi) nungia yar tsüngsanger kar arua shilem agitsü lir. Aug 2 nü temeshi amung mungar Aug 3 nüji Ain Lenpi maparen inyaka iba benjong tembangtsü.

Longsa yim dak Tsüngremmung ya akhi mapang nungi metsünga reta munga arur. Aji oda, alimai metettsüsa Longsa nung Tsüngremmung benjong tulu amung tenzükbä yabo talisa 2006 küm state sarkari Longsa ya tourist yim ka ama agizüka Department of Tourism den yaritepa kümshi benjong kayonga arur. Iba benjong nung local tourist dang masü bendang balala nungia metapenzürtema dena arur.

Longsa yim ya Mokokchung town nungi kilometer 29 shi pilar lir. Taküma Tsüngremmung

sentong tajung renema lir, anungji, iba benjong daki senso nübur, anakabang aser tejangrar ajak pela shishia jaoker, ta Longsa Village Council-i ayongzüka metetdaksü.

Longsa yim dak otsüsütsü aketba tesem tatishitsü agi - Longkakak, Koralong, Longsalong, Ko Kongki, Awatsü tzipu-tem lir. Iba den ano Yimpenzükong nung mitza ka yanglua kar, yangji tangu satoka aser mopung tanep agiba dang masü yang nungjagi Longsa yim aser temeket yimtsüng kar den tanga district-tema temenungratsüka angur.

Asen Aori alu nung tsük, aonsotsü aser süngjanglijang kechisa inyakteta ali, item ajak asoshi Tsüngrem nem tenüngsang agüja ano temoatsü meshia amungba dang Tsüngremmung ta ajar. Ao lima nung Tsüngremmung ya mezüng Longsa nung tenzükbä nungji, mapang talangka Longsa tama mungarang Ao yim balala nung mungyonga aoba otsü ajanga jangjar.

Yamaji Tsüngremmung mapang balala nung munga alidang, Dr. & Mrs Clark-i Ao limai tamangba yimsü den kakat shisatsü bener arua Impur nung school lapok aser Aor lanurtem anitena züngdaksü. Saka kodang Tsüngremmung mapang arudir, yimtsüng shia anogo balala nung sodi agütsütsüsa aküm. Iba jagi school nung timtem tulu ajuru. Ibaji ajiteta 1944 küm Ao kaketshir Mungdang (AKM) Longjang nung amungdang Tsüngremmung ya Aor ajak lirumedema amungtsü lemtet. Yamaji 1947 nungi August 1-3 Aor ajak sümedema iba benjong munga arur, ta angazüker.

Kamrup Metropolitan Zila Sahitya Sabha züngsem temi CM ajuru



Kamrup Metropolitan Zila Sahitya Sabha, Assam nungi arurtem Nagaland Chief Minister Dr. Neiphiu Rio den Sovima nung July 27, 2026 nü tangokba noksa nung angur.

Kohima, Chiteni/July 28 (TYO): Kamrup Metropolitan Zila Sahitya Sabha, Assam tir Prafulla Barman-i anir züngsem temi July 27, 2026 nü Sovima Village, Chümoukedima nung Nagaland Chief Minister, Dr. Neiphiu Rio ajurua liasü.

Iba mapang parnoki Dr. Rio dang Kohima Sahitya Sabha asendenshiba aser tashi itshiba nung yaritsü aser tarutsü nung Assam aser Nagaland tsüngta kakat ken o aser sobaliba nung tesendaktep adokdaksütsü nükjiding nung parnok aru ta ashi.

Senden nung parnoki Kohima Sahitya Sabha otsü lemsatepa liasü.

Assam Sahitya Sabha indang

founding president, Reverend Sahitya Charyya Padmanath Gohain Baruah ya Kohima nung tesayur ama inyaka alidang Kohima Sahitya Sabha ya 1895 küm tenzüka ta ashir.

Iba ya Assam Sahitya Sabha indang mezüngbuba office lir aser kakat ken o meimba Nagaland aser Assam nüburtem tsüngta tajung bilemba, kati ka akumtsüboba, temeim sayuba temaitsü lir. Kakat ken o aser sobaliba senmang nung iba yagi maneni kuli tajung sayur.

CM Rio-i parnok pela agizük aser linük ana tsüngta kakat ken o aser sobaliba tesendaktep aliba tashi itshitsü asoshi inyakba atema pelaba lemsatepa liasü.

Rio-i Kohima Sahitya Sabha asendenshitsü aser terenlok atema state sorkari akokba lenmang nung yaritsü ta ashi aser iba atema tapet mera agitsü ta shia liasü.

Paisa Assam aser Nagaland tsüngta tesendaktep tashi itshitsü aser kaken ken o aser sobaliba melentepba atema bendanga agütsür inyaksü temulungtetba aliba lemsatep.

Kamrup Metropolitan Zila Sahitya Sabha ajanga semdangba ya state ana tsüngta sobaliba nung lungjemer inyakba tsütsü tongtipang mera agiba alitsü, ta Teisovikuolie Therie, Deputy Director, Art & Culture Department, Nagaland ajanga ashi.

Nagaland nung World Hepatitis Day mungogo

Dimapur, Chiteni/July 28 (TYO): Department of Health & Family Welfare, Kohima ajanga "Let's Break It Down" omen nung ajemdaker July 28, 2026 nü IDSP Hall, Kohima nung World Hepatitis Day munga liasü.

Kasa mapang national-level nung virtual yimya nung World Hepatitis Day tenzükbä nunga department dena liasü, koba Anupriya Patel, Minister of State for Ministry of Health & Family Welfare, Government of India ajanga semzüksü.

Mission Director, National Health Mission (NHM), Dr. Keveduyi Theyo-i pela agizükba o jembidang, temesen tashidak tamajung aser temesen cancer ama kumdahtsüba temesen nung komo indang awareness agütsütsü asoshi World Hepatitis Day ya küm shia July 28 nü amunger, ta ashi.

Iba anogomung amungba ajanga hepatitis nungi kumzüka alitsü merangba nung tashi itshir, kija, partners aser nüburtemi lungjemer mera agitsü

ajungmesor aser viral hepatitis samatsü asoshi alimai inyakba akangshir, ta ashi.

Ajidang masü July 28 ya Dr. Baruch Blumberg asoba anogo lir, shibai Hepatitis B virus bushitet aser mezüngbuba diagnostic test aser vaccine yanglua liasü.

Dr. Theyo-i Nagaland nung National Viral Hepatitis Control Programme (NVHCP) tensa lemsatepba mapang, Hepatitis B aser Hepatitis C cases timba Kohima, Dimapur aser Mon district tem nung lir aser mashisa tetsür dak Hepatitis B ya Dimapur aser Kohima nung timba puteter, ta ashi.

Pai ashiba agi, NVHCP kübok screening, diagnosis aser treatment services küm aika kanga renloka aruogo, aser iba ajanga state nung hepatitis care tajungba lir.

Principal Director, Department of Health & Family Welfare, Dr. Mereninla Senlem-ia iba sentong nung NVHCP inyakyim indang lemsatepa liasü.

PM Modi-i Assam nung tzümetsüing tensa asadangogo



Assam MP-temi Prime Minister Narendra Modi ajurua Assam nung tesem balala nung tzümetsüing tensa indang metetdakja sensaksemba noksa nung angur. Assam BJP President Dilip Saikia-a noksa nung angur.

New Delhi, Chiteni/July 28 (Agencies): Mongolbarnü NDA Parliamentary Party senden amenba sülen Ato Kiloner Narendra Modi-i Assam nung tzümetsüing tensa asadangtsü asoshi Assam nungi MP tem den senden ka mena teyari agütsütsü aser rehabilitation atema sensaksemogo.

Senden ya Ato Kiloner indang chamber nung amen, kong Union minister Sarbananda Sonowal, Union minister of state Pabitra Margherita, Assam BJP tir aser MP Dilip Saikia nunger den tanga legislator temi shilem agia liasü.

Senden nung MP temi tzümetsüing ajanga teraksatsüba tulu bener arutsüba aser Himanta Biswa Sarma-i aniba Assam sorkari teyari agütsüba maparen balala benoka inyakba indang PM nem metetdaksü. Saikia-i tensa asadanga indang osang tejangja agüja liasü.

PM nem agütsüba osang nung April 29 nungi July 25 nü tashi nung tzümetsüing ajanga Assam kübok district 25 aser revenue circle 77 kongshiba indang metetdaksü. Ajak senteper tzümetsüing yagi yimtsüing 2,145 aser nisung 11,41,640 dak kongshiogo. State-i relief camp 210 lapokogo, kong nisung 68,258 jenoka lir aser relief distribution centre-a 1,610 amenokogo.

Tzümetsüing dak sendakba tatalokba balala nung asür nisung 68 jungogo aser nisung ti samar bushidar. Maneni tzümetsüing yagi ki 425 ajunga raksatsüogo aser ki 3,550 terara raksatsüogo. Maneni nisung 29,923 tanga tesemi aninogo.

Source temi ashiba agi, PM-i ken o kanga junga angadang aser Gujarat nung CM inyakba mapang tajangshibatam indang lemsatepa liasü. Gujarat disaster management model indang atishia jembiba mapang PM Modi-i, jongdak mapang takaratiba nung teyari

agütsütsü aser standard operating procedure koda tongtibang iba indang lemsatep.

PM-isa, Assam sorkar dang tzümetsüing agi kongshir aliba kibongtem nem Gujarat nung amshiba ama comprehensive relief kits lemtsütsü shidangogo. Iba kits nung ya chiyongtsü, süoshi, mozü, chipo aonpo aser kidang tenüngdakba oset balala densema lir.

MP temisa, Bodhbarnü nungi tenzüka Guwahati nung amenkdaker tzümetsüing agi kongshir aliba kibongtem nem sen crore 12 alang tenüngdakba osettem agütsütsü, ta PM nem metetdaksü.

Kasa mapang nung PM-ia takok tashi teyari agütsütsü nangzükogo aser Assam sorkari iba timtem lendong ya kanga junga achayangba asoshi tenüngsang agüja liasü. Central team kati Assam nung tensa asadangdar saka Union minister tejen ka state-i yoktsü sentong aliba PM-isa metetdaksüogo.

Delhi sorkari Lakshmi Yojana kübok tetsürtem nem ita shia sen 2,500 agütsütsü

New Delhi, Chiteni/July 28 (Agencies): Delhi sorkari Mongolbarnü 'Delhi Lakshmi Yojana' agizükogo, koba ajanga tetsürtem nem senotsü teyari agütsütsü.

Delhi chief minister Rekha Gupta-i ashiba agi, iba sorkar scheme atema temsüa aliba tetsür ajak nem sen 2,500 agütsütsü.

"Delhi Lakshmi Yojana cabinet-i agizükogo, aser iba atema portal ka August 1 nü amenoktsü," ta Gupta-i ashi.

"Temsüa aliba tetsürtemi iba scheme atema apply sütettsü, aser applications tem kanga junga asadanga sülen agizüktsü. Beneficiary mezüngbuba batch nem Raksha Bandhan meta mezüngbuba instalment agütsütsü imla atadar. Sorkar kümteter küm ka ser tesadang majung tsüingda onoki nangzükba ataloktsütetba atema kanga pelar. Ni Delhi nung aliba tetsürtem nem tenüngsang agütsü aser iba sorkar yagi parnok temaotsü nung parnok

ajangzükdaksütsü atema maneni inyaktsü ta tenangzükba agütsür," ta Gupta-i osangbenertem dang ashi.

BJP lenir yagisa, application tem kanga junga asadanga sülen sorkari, Raksha Bandhan tashi nungbo mezüngbuba instalment agütsütsü atema inyakteptsü ta ashi.

Inyakyim kübok applicant temi parnok ya taoba küm ter tashi Delhi nung alir aser criminal record kecha mali ta sangdongtsü nüngdaker.



NEET atema longkak aitba mapang kaketshirtem dak tashiyim amshiba anema Kolkata nung BJP supporter temi ayongzükba 'Desh Bachao' rally nung kaketshirtem, tesayurtem aser nüburtemi shilem agiba noksa nung angur.

SC-i longkak aitba kaketshirtem anema tashiyim mamshitsü tuyu

New Delhi, Chiteni/July 28 (Agencies): Supreme Court-i Mongolbarnü, Delhi aser linük kübok tesem balala nung kaketshirtemi longkak aitba mapang parnok dak tashiyim amshiba ya tebandang kecha makai kanga junga bushisüingdang asütsüla ta shiogo.

SC-isa, longkak aitba mapang pua aliba minor tem tangsa tang chiochtsü aser police dang longkak aitba kaketshirtem anema jenjang tesashi magitsü mesüra parnok indang jurila data tem yimjak nung memetetdaksütsü asoshi tetuyuba agütsüogo.

Chief Justice of India (CJI) Surya Kant-i anir justices Joymalya Bagchi aser V Mohana nungeri kümtetba bench kati, kaketshirtem kümzüka ayutsü atema tetuyuba agütsüba ya lokti anema jenjang agitsü tebilemba nung shilem agirtem, mesüra taoba mapang ozüing raksartem atema masütsü, ta shiogo.

Union sorkar aser Delhi, Maharashtra, Bihar, Assam, Kerala, West Bengal, Madhya Pradesh aser Uttar Pradesh indang chief secretary tem nem osang agütsüba mapang SC-i, longka aitertem dak police-i tashiyim amshiba aser police personnel tem anema jenjang agiba ya bushisüingdang nüngdaker ta shiogo.

"Petitioner temi ken o benoker aliba ya jurila bushisüingdang asütsü nüngdaker," ta iba bench yagi ashi. Parnokisa, bushisüingdang mapang yirur aliba police personnel kinungertemi tashishiba benoker aliba den asadangtsüla, ta ashi.

Paper leak asüba atema July 20 nü Delhi nung Parliament leni longkak aita aoba aser iba sülen state balala nung longkak aitba mapang longkak aitertem dak tashiyim amshiba atema tashishiba balala benoker aliba mapang SC-i iba tetuyuba agütsüogo.

Ken o angadanga mapang bench yagi ashiba agi, longkak aitertemi yimjung nung dang longkak aitra parnok temzüing ozüing agi kümzüka lir, ta ashi. "Iba longkak aitba sentong ya kaketshirtemi parnok taginüba khanga yimjung nung longkak aitba ka liasü. Iba amala longkak aitba sentong atema Constitution-i teküzmükba aser temelaba agütsür," ta CJI-i ashi.

"Yimjung nung longkak aitba mapang mejaokertema tanga onük bener arua shilem agir aser parnok co-host tem akümer. Anungji item ajak atema jurila bushisüingdang asütsü nüngdaker," ta parnokisa ashi.

Okadakisa, pellet gun, electric baton tem amshiba, süng agi azükba, tetsür longkak aitertem aser osangbenertem dak teka sangshiba aser civilian süoshi semer police personnel temi longkak aitba nung shilem agiba indang tashishiba benoka

lir, ta ashi.

"Pellet gun, electric baton amshiba aser süng agi züka merenshiba ajanga taküm amokmerentsüsa yirutsüba amala ken o kar lir. Pellet gun tem talitapong amshiba ya reprangshitsü nüngdaker," ta SC-i ashi.

Okdakisa, longkak aitba mapang police personnel 200 dak tema yirua liasü, ta ashi.

Union sorkar aser Delhi Police tenüing nung nokdaksang Solicitor General Tushar Mehta-i ashiba agi, jurila bushisüingdang atema sorkari kecha tashishiba mali. "Kaketshirtem timtem tekangshi ajangshir lira aibelena alirtem merenshitsüla," ta Mehta-i ashi. Paisa, longkak aitertemi police amakba dena bushisüingdang asütsü mepeshia metetdaksüogo.

Mehta-isa, longkak aitba mapang ozüing alema inyaksangshirtema densemer alitsü akok ta ashiba den kaketshirtemi ozüing alema inyaksangshiba nung shilem agir asütsü tabo pai mamanger.

Iba bench yagi ken o anaprongla ya shitak aser bushisüingdang nüngdaker ta shiogo.

"Yimjung nung longka aitba mapang temulung melemtep adoktsüa ana nung lir," ta bench yagi ashi. "Ya shitak asütsü ta bilemba dang masü saka scientific aser kuli dak ajemdaker bushisüingdang asütsü nüngdaker," ta parnokisa shisem.

Okadakisa, Delhi nung tatalokba dang masü tanga tesem nung tatalokba tema bushisüingdang tsü asoshi high-powered committee ka tentettsü asoshi parnoki asadangdar ta ashi. Parnokisa, longkak aitba mapang amshitsüba police inyakyim koba benoka ali item ya asadangshitsüsa akümtsü akok, ta ashi.

"Taoba mapang obendang agütsür alibatam ya mapang melenshiba apir yanglushitsü nüngdaksü. Item principle tem ajak bendena yanglushitsü atema mapang tongogo," ta bench yagi ashiba den, tear gas amshiba aser tanga tashi amshiba dak sendakba nung temelenshi bener arutsü atema pei tebilemba lemsateptsü metetdaksüogo.

Iba dak sendakba nung okadaki CCTV footage, drone recording, body-worn camera footage,

wireless communication record aser longkak aitba dak sendakba nung call tem rizünga ayutsü tetuyuba agütsüogo. Okadakisa longkak aitertem indang digital data rizünga ayutsü, saka parnok indang jurila osang kecha yimjak nung memetetdaksütsü police nem tetuyuba agütsüogo.

Iba ken o ya taruba Hombarnü maneni angadangtsü aser iba mapang Union sorkar aser state temi parnok telangzüba agütsütsü imlar.



TIR YIMYIM YIMOBILEM (EDITORIAL)

DIMAPUR WEDNESDAY, JULY (CHITENI) 29, 2026

Alia agüjang, temenoka agüjang !

Taküm küm ya Nagaland nung tzünglu kanga aruba agi tesem aika nung tzümetsüng aser anentsü agi nisung taküma aika samaogo aser kiojen aser alua aika raksaogo aser tesem ajaklen gari lenmang raksar nisungtem timtem tulu nung lir. Itemji majangshirtemibo kecha balaka shishia meblemetsüa akok saka item lendong timtem ajururtem tiaji temeimtsüka lir. Tanga state nung asünungbo iba ama alima lendong tulu ajurudang, state government-i jet ta senotsü, jangotsü aser mozü tashi agüja anepalur, ajisüaka asenokbo tangar ama masü, government nung alirtembo takar asütsüa akok saka government-bo sensaker, anungji tangar state amaji government-ibo meyaritetsü, anungji aria bilemer arogo, lokti tentet aser kija kibongtemi meyarira tzümetsüng aser anentsü agi tesama aser takoksa ngur timtema alirtemji tekümzükdak aser tejenokdak makatsü. Atangji, asenoki loktiliba aser yimten asenoki aginüba ama junga meyangertetaka, asenok sobaliba tajung kaji lendong timtem mapangbo asenok kinungertem rongnung dang masü saka kidang-kiyonger, yimtsür yimer aser metettepa alirtemi akok tashi yariteper. Ibayongji, asüama aser takoksa lendong tulu ajurur alirtema rongsen teyari anguba dang masü saka mulung anisüngzüker aser iba ama yaritepba jagi timtem tulu ajuruba mapanga tesünep aser teimla angur. Iba ama sobaliba tajung yabo asenok Khristan makümdangyongi asen tsüraburtemi benshia liasü. Ashiko, asenok Khristan kümer külenang asenok taküm kibong aika nung sobaliba awashi tajung aser temeim mesayuteti akümer asütsüa akok. Ajisüaka, tang ama tesem aika nung tesama aser takoksa tia nung nübortem aika timtema aliba mapang ya takokertem asoshibo agütsütsü mapang tajungtiba lir. Aji oda, tang ama mapang ya timtem takoksa ajururtemji asüama ajurur aser kiojen raksartemji dang masü saka yimkong timtem ajurur, kechiyong pei kibong nung kecha timtem matalokyonga yimkong jajaba gari lenmang raksaba ajanga pei onüleni moutet aser teinyaknüsü meinyaktet nisung aika akoksadagi. Iba ama timtem mapang, asen government-ibo asenok nüngdak menepa teyari metongtsütetsüa akok, anungji takokeribo pei nübo aser rongsen agi yimkong jajaba lenmang anentsü agi nembanga lira, aji peisasa rajema yadoktsütsüla. Ibaji dang masü saka taküm küm ya nübortem asoshi timtem tulutibaji anentsü dang masü saka tongtibang gari lenmang aika nung tesem aisü nung lenmang mali küma atemoka yiadoker lir. Joko, item atemoka aiba tesemtemjibo yanglushitsüla masü, ali tasen tuloka lenmang tasen lapoktsüba dang lir, anungji kong südir süaka ali kiburtemi pei li nung lenmang tasen tatsükaji lapoktsüsa kümra, angati mulungsua tenla agütsütsüla aser ano külen, government-ia government inyakyim nung aliba ama alimenok agütsütsüla. Iba amaji asenok nübortem mulungsua yariteptsü aser ali kiburtem o government na tsüngda nunga kati ka nüngdak aser temeten mezüngmeshii mesüi yimkong ajangzüksü bilema pei lima aser nübortem meimba teindang shisatsü agi terenlok mapatem inyaksü junger. Atangji, tang ama mapang ya asenok ajak asoshi 'ni kechi angutsü?' ta bilema inyaksüba mapang masü saka 'nia kechi agütsütsü?' ta bilema inyaksüba anogo lir.

OLEMSABANG

NAGA NUNGER DANGI


~ T. Lima Jamir, Artang Ward

Khrista nung temeim asen Aor aser Aotsür aser Nagatsür aser Naga nunger aser amangbapur tajungtem asen Naga lima nung Khristan nüsüng noklang nung noklang Ir, süra amongnü sentep ki nung mesemi atenshidar ma? Asen Nagaland Khristan yimsü arur küm 153 dak tali arur asünung ajak kodaki otetsüsa amangdar ma aser ajaki kotaki onür asünung tzüsener aser kibong shia Laishiba aser Ken kaket ayur aser azünger aser ken atener. Saka pei temulungjang nungbo kibong raksatsütsüsa aser pesaprong adokdakja rarapangsen ataloktsütsü tasa tamajung atonga kalak küpong mapa inyaker karbo ali mali, temenen tanülaizi tezü tener ne dangi aser kü dangi marutsü, saka pei mulungjang meshiteta aser asüngteta maliba ajanga temenen tanülaizi asen atsüngpanga arur, tamanger kibong ajak nung laishiba yua alitsü asünung Yober kibong nung kechi atalok ajakji kanga junga züngdangang. Tamangerbo tamanger sürnung tenük merem aser mokokachi agi sünger litepba agibo kotak yimli meitettsü. Yob kinungtsü ama Tsüngrem mangatetba lir, kodanga pei jala aser jabaso tajung mekümdaktsütsü, nai sayu aji dang ner jalai aser jabasotemi inyaksü aser benshitsü ta angatettsüla. Hopta shia tetsür sentep talila ka agiba ya tapi agi agir masü ta angatettsüla. Yamaji tetsü anogo nung asen jalai aser jabaso oja dang ya shinür ta ashibatu mamadoki alitsüla. Tetsü sentep anogo tetsü meim akhüm tetushi koma agütsür, yamaji tetsü taküm ka Tsüngrem akhüm tsübua kibong anitetsü merangtsüla.

Kinungbortemibo pei kibong tepok chiyungtsü asoshi anepaludang chi tila ka chiyonger kar hajira aotsü, kar officei aotsü aser menur arutsü. Tanurtem schooli aor aser kinungbo pei pei mapai or nenok tetsürtem mapa maka asünung ki ka nungi ka kisemi aor aser tangar ka kibong majung dang nüngsen o jembia kazür, yamaji tangar majung indang nungsen jembia senzüba dang nungibo kidang laishiba ka tanga zünga menra na asoshi aji temoatsüba asütsü. Temeim nüsüng nübur aser amangbapur tajungtem tanga bendang lima nung koma alir ajibo memetet, saka asen Mokokchung temeket nung lenmang balala nung aser town nung yi jemer nungzütepa mangur aser majurur aser yi agi letseta asüba osang kangabo mangur, yamaji aiertemi asangur nem pongdaktsür lenmang aser town ajak mekongdakja asatepa aser menoa senzütepa mangur aser majuru yamaji asen town lenmang aser pei taküm maneni melenshia aotsü merangang. Khrista nung temeim asen Aotsür aser Aor aser Nagatsür aser Naga nunger nüsüng nübur aser amangbapur tajungtem, Yober kibong liyonga aodang koba tashi timtema aru, saka Yobi tamang nung akangakanga marakzüi Tsüngrem tali bushia ao, saka Yob kinungtsüi Tsüngrem sentok aser asüküma aruba Laishiba nung angutsü. Yob kinungtsü dak tenük merema alitsü südi. Yob kinungtsüi Tsüngrem mangateti liaka Yobibo Tsüngrem tali akhümstübua aliba ama asen Aotsür aser Aor aser Nagatsür aser Naga nunger ajaki Yob ama lidar ma?

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

US nung temeshi tesem ka kumzüksü mechi maneni atsüteper



Sunland Park, New Mexico nung aliba Mount Cristo Rey nung tamangertem adenshia aliba noksa ka yangi angur.

El Paso, Chiteni/July 28 (Agencies):

US Tir Donald Trump administration-i arütsülen jara yanglutsü atema New Mexico pilgrimage site ka agitsü merangba asoshi court nung maneni atsüteper, kechiaser Texas özüng yanglur temi iba tesem agiba nokdangtsü atema özüng ka benok.

Federal sorkari iba tesem kibur akumba ya tesüngmangtsüka lir aser özüng agi bhukumtsü jenjang nung masü ta iba tesem kumzüka ayutsü asoshi inyakba attorney ajanga ashir. Sorkari iba tesem asoshi tamangba yimsü temeden kecha mejembitsü meranger.

Sunland Park, New Mexico nung aliba Mount Cristo Rey densema ali acre 14 agitsü sorkari merangba den Diocese of Las Cruces, New Mexico ya hopta aika rara arur.

Süklep 4,675 talang tenem kolak nungya Jesus Christ the King kerak yanglu süklep 29 talang ka lir, koba küm noklang jungnüa Catholic nunger asoshi temeshi tesem ka ama amshia arur.

Küm shia tamanger meyrirjang aika iba tesemi arur, kong kangki ka tesülen Yisu teka songlaba ama yanglua El Paso, Texas aser southern New Mexico tsütsü tejak shia lir.

Federal sorkari May 7 nü ken o ka benokba nung nübur amshitsü asoshi jirula ali kimong agitsü sorkar dak tashi aliba indang shia lir aser iba ali mechi Fifth Amendment nung shia aliba ama "compensation" dang agütsütsü ashir.

Diocese of Las Cruces yagi First Amendment aser Religious Freedom Restoration Act kübok temeden agüja aliba amshir.

RFRA ajanga sorkari nisung ka tamangba yimsü nung sorkari tejangraba nung tebilemtsü khuret agütsüba nokdang aser iba ama tensa nunga parnoki tenokdangba tesashi mamshitsü shia lir.

U.S. District Court for the District of New Mexico nung iba ken o jembir, aser Rep. Veronica Escobar, D-Texas ajanga July 20 nü "Mount Cristo Rey Protection Act" ya benoka liasü.

Iba mera ya ajanga iba tesem

ya temeshi tesem ka ama züngshitsü aser Mount Cristo Rey nung arütsü atsü yanglutsü bilema aliba nung federal funds amshiba nokdangtsü aser Las Cruces Diocese anema ken o benokba nokdangtsü.

Escobar-i protection act sangdongba anogo Trump administration-i court dang iba arogo indang 'religious freedom argument' ya tai aser özüng kecha agia memedentsür ta ashi.

"First Amendment ya tai nem jong tongloksüba masü; iba yagi arogo tem mesüra newsrooms mesüra nüburtem adenshiba tesemtem tai tongloksüba nungi kumzüka mayor," ta federal sorkari July 20 nü benokba nung legal term amshia ashi.

Iba melen 'constitutional limitation' ajak agi Fifth Amendment nung compensation agütsütsü shia aliba ya kisüng lir, ta Trump administration-i ashir.

"Federal sorkari ali meshiba tamangba yimsü tentetji Diocese ya mezüng masü, saka trok shi lir," ta federal sorkari ashir.

Saka First Amendment aser RFRA ajanga mela aliba khenyongi mezüngshitsü ya tesüngmangtsü aser özüng agia menungiter, ta Institute for Constitutional Advocacy and Protection, Georgetown University nung senior counsel aser iba ken o nung Diocese of Las Cruces tenüng nung nokdaker attorney Jonathan Backer-i ashi.

July 27 nü OSV News dangi email ka yokba nung, U.S. District Judge Kenneth J. Gonzales ajanga June 15 nü obendang agütsüba sülen federal sorkari iba ali indang tenüng agiogo, saka court-i sorkar dang iba tesemi oa yangji arütsü jara yanglu tenzüksü temelaba magütsü, ta Becker-i ashi.

"Arogoi ken o benokba jembitsü ta court-i jangja-jangja shiogo," ta Backer-i ashi.

Arogoi ken o benokba nungya federal sorkari Mount Cristo Rey raksatsü, arütsü jara yangluba ajanga iba temeshi tesem raksatsü mesüra iba tesemi aoba nung tenokdangba agütsütsü ta ashir.

Iba den ano Trump administration-i iba ali agiba ajanga arogo-i ketdangsüba mapa songtemtsü, kong ali kibur akumeri Diocesan ali ya Catholic tamangba yimsü yimya nung mamshitsü, ta parnoki ashir.

Diocese of Las Cruces-isa 'just compensation' ta shia aliba indanga jembitsü akhanger, koba fair market value nung ajemdaker jenjang atettsü, aser federal sorkari sen \$183,071 jenjang asütsü ta asadangteta lir.

Ajisüaka July 6 nü ken o benokba nung arogoi iba sen ya magizüker aser federal sorkari iba tesem nung oa ali kimong ya masadang ta ashir.

Federal sorkari anasa sorkar meyong 7.3 acre ali ka arütsü jara yanglutsü asoshi agitsü bilema alibabo sen \$798,500 agütsütsü asadangteta lir, ta parnoki ashir.

June 28 nü Las Cruces indang Bishop Peter Baldacchino-i anir Las Cruces aser El Paso dioceses nungi tamanger 500 dak tema den Archdiocese of Santa Fe iba tesem kumzüka ayutsü asoshi oa sarasadema liasü.

Iba tenem nung Auxiliary Bishop Anthony C. Celino of El Paso den külemi sentong agidang Bishop Baldacchino-i sorkar ketdangsür mulungjang nung jembitsü asoshi sarasadema liasü.

Federal sorkari tang tesüsa benokba nung telangzüba agütsütsü atema Gonzales-i arogo nem August 3 tashi agütsü aser iba sülen Trump administration-i August 10 tashinung langzütsü.

Vatican-i Korea nung Confucian-Khristan mungdang ayongzüksü

Seoul, Chiteni/July 28 (Agencies): Vatican indang Dicastery for Interreligious Dialogue ajanga South Korea nung Confucian-Khristan mungdang mezüngbuba ayongzüksü sentong lir, kong linük 12 nungi putir, shisashirtem aser practitioners tem adenshia nisung tem dang temeim tali sayuba lima yangertsü asoshi lenmangtem bushitsü.

August 4-5 mungdang ya Seoul nung aliba Sogang University indang Jeong Hasang Hall nung agitsü aser iba mungdang ya "Dialogue on the Contribution of Christianity and Confucianism to an Ideal Society: New Heaven, New Earth, and Great Unity" omen nung ajemdaker ayongzüksü.

Iba mungdang ayonger temi ashiba agi, mungdang nungya Jungkai Adok nung "kotak tasen aser alima tasen" ta shia aliba aser Book of Rites nung 'Confucian ideal of Great Unity' indang shia aliba asadangtsü, ta Catholic Times of Korea ajanga ashi.

Mungdang ayonger ya

Ne mulungtet takang

Aser kodang pa temai adoka agizüksü anogo abensa ya adok, pai Yirusalemi aotsü mulung mulunga pa tejak ilenji meyip. Luke 9:51.

Khristan taküm nungi atsüngzüka aotsü temela! Kodang Tsüngremi ne nem kechi inyakdaksüner aji nai angatetta arur na meketa alir ajaki ne mapang aser teyari ajaki ama asütsü! Kodang Yisu asoshi kangki-i atutsü mapang tonga aru, pai pa tejak Yirusalem leni meyip, aji asü nungdang shingai Tebui mulungba menokdangtettsü. Pa temulungtet tejanga ngur Samaria nungeri Yihuda nunger ka parnok yim ajanga Yirusalemi aor bilema parnoki pa magizük.

Yisui pa tenyaba nungi matsüngzüksü mulungtet saka pai leman nung aika tenzüksü mapang agi pai nütsüng neter temeket townsi yok (Luke 10:1). Pai chitemra akettertem anebtsü (Luke 17:11-19). Temang waka shirangertem anebtsü (Luke 14:1-4). Pai Zachariah kidangi tekümtet bener aru (Luke 19:1-10). Pai maneni nütsüngtem dang sayu (Luke 15:1-32). Yisu Kalvaryi atudang Pai tangar tenzüksü mesongtem saka Tebui mulungba nungi atsüngzüksü pai memelung.

Tsüngremi ne nem kechi inyakdaksüner nai metetta lira, ibaji atalokdaksütsü bendanga mulungtetter, ne tejak mulung mulunga iba tsütsü meyipang (A.Shin 4:25). Tangar matsüngdang na Tsüngremi aniba kuliji ne temulungtetbaji asütsü. Na meketa mapang tajungi (opportunity) Tsüngremi na ajaba alizüng nungi matsüngzükdkaksütsü kümdangang. Tatitangbai tashi angatsü menua tekümdaksü mesüra tesentokdaksü. Nai Tsüngrem nungi tejangja mapa agizük, ne tashi angaba nung mainshi inyaksüla.

Catholic Bishops' Conference of Korea, Sungkyunkwan University aser Sogang University alitsü.

Iba mungdang nung Dicastery for Interreligious Dialogue indang prefect, Cardinal George Jacob Koovakad den Fathers Indunil Janakaratne Kodithuwakku Kankanamalage aser Paulin Batairwa Kubuya densema dicastery ketdangsürtem adentsü imlar.

Iba den ano Cambodia, China, Hong Kong, Indonesira aser United States nungi clergy, religious, theologians, philosophers aser tamangba yimsü aser sobaliba balala indang jembir densema Confucian aser Catholic scholars tem adentsü imlar.

Confucian yimsü sülen anidaker den Vatican indang dialogue office-i maneni tarokba nung jembishinü akatsü merangba mapang iba mungdang ya amunger alitsü.

2024 küm Taiwan nung aliba dicastery aser Fu Jen Catholic University ajanga Christian-

Confucian dialogue indang tetuyuba aser teimla atema senden ka ayongzüka liasü.

Iba mapang Vatican News ajanga Taiwan senden ya Confucianism sülen anidaker den jembishinü akatsü asoshi guidelines yangluba nung tongtipang mera ka ama lir, ta shia liasü.

Nüburtem tsüngta telemsa adoker, libajen tebilemtsü aser yimya tajung samaa aoba mapang Seoul mungdang nungya meimchir ajunga kibong ka nungi, tatishitsü tajung aliba lenir, ochi nung yimsü asüba aser libajen kumzüka ayutsü atema lenmangtem bushitsü imlar.

Christian-Confucian dialogue maneni renlokba nung yaritsü atema iba mungdang nung jembiba ya Dicastery for Interreligious Dialogue indang kaket Acta Pro Dialogo nung adoktsü, ta mungdang ayonger temi ashir.

Iba den August 6 nüparnoki Korea nung tongtipang sobaliba aser puti otsü aliba tesemtem semdangtsü sentong lir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züklok

(v) amlök, neplok, teplok (attach, join)

* TMC tatartem kar BJP nung züklok.

Zükma

(v) ana küma lepdang (cut into two portions)

* Ak mang ka zükmar kenu küna alem.

OLONG PAITEP # 7581

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S_ _ _ i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

-

(5)

-

(5)

-

(5)

-

(3)

-

(3)

-

(4)

-

(4)

-

(3)

-

(3)

-

(5)

-

(5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

-

(9)

-

(5)

-

(7)

-

(5)

-

(5)

-

(9)

-

(7)

-

(5)

-

(5)

OLONG PAITEP # 7580 TELANGZÜBA**TIPIEN :**

1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa, 15. Putir,
16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER

Kenya nung tzükümlen aliba kaketshirtem aser scouts-i Guinness World Record ka yangluogo aser iba ya "largest number of people planting mangrove trees simultaneously" lir.

Mombasa County nung Jomvu Kuu Mangrove Site nung World Mangrove Day tenüng nung Kenya Forest Service (KFS)-i Kenya Scouts Association (KSA) den yaritepa iba sentong ayongzüka agi aser nisung 4,000 tema aden.



Manipur kübok Imphal East nung security forces-i prangpong-injang aika apuba noksa nung angur. Wakha Ching area nung prangpong amertem senzüba osang ka angazükba sülen Special Commando Unit aser 6th India Reserve Battalion (IRB) sepaitemi Wakha Hill anasa mita aodang plastic bags kar nung prangpong 29 aser magazines aika enoka aliba angu.

Assam MLA temi tzümetsüng atema itasen tenlatsü**Guwahati, July 28, 2026**

(Agencies): Assam MLA temi tzümetsüng agi kongshia alirtem yaritsü atema ita ka indang itasen tenlatsü metetdaksüogo.

Rajior Dal dak alaka political party balala nungi MLA ajaki relief & rehabilitation efforts asoshi itasen tenlatsü.

"Kü den Deputy Speaker Habbey Teron nati ita ka indang itasen agütsütsü" ta Assam Legislative Assembly Speaker Ranjeet Kumar Dass-i ashi.

Assembly Secretariat nung mapa inyaker ajaki anogo ka sen relief & rehabilitation atema

agütsütsü ta paisa metetdaksü.

Parliamentary Affairs Minister Pijush Hazarika-i iba mapa pelashishia agizük aser BJP MLA ajaki ita ka indang itasen agütsütsü metetdaksü.

Assam nung Trinamool Congress MLA Sherman Ali Ahmed-ia pa indang ita ka itasen tzümetsüng agi kongshia alirtem nem agütsütsü ta ashi.

Congress-i tesüiba anogo ishika flood relief maparen inyaka arur aser party MLA ajaki ita ka itasen iba mapa asoshi tenlatsü ta Leader of the Opposition Wajed Ali

Choudhury-ia ashi.

Party president Badruddin Ajmal-i itasen den teimba AIUDF ajanga tenalogo. Ajisüaka party MLA temia ita ka indang itasen tenlatsü ta AIUDF MLA Mazibur Rahman-i ashi.

Külen, AGP MLA Prithiraj Rava-ia par party ajanga kasa tenla agütsütsü ta metetdaksü aser BPF MLA Paniram Brahma-ia kasaji nangzükogo.

Ajisüaka, Rajior Dal-i sangdong kecha magütsü lir. Assembly nung parnok MLA Mehboob Muktar dena liasü saka pai kecha mashi.

Meghalaya voters lakh 1.5 shi ASDD category nung lir**Shillong, July 28, 2026**

(Agencies): Meghalaya nung electoral rolls indang Special Intensive Revision (SIR) agidar aser tang tashi nung Absent, Shifted, Dead and Duplicate (ASDD) category nung voters lakh 1.5 shi jangjaogo.

ASDD category nung voters 1,49,656 shi jangjaogo aser parnok

ya state voters 23,49,645 nungi 6.37% lir ta Chief Electoral Officer (CEO) B.D.R. Tiwari-i ashi.

ASDD category nung alirtem ya parnok 74,851 tasürtem, 37,914 ki belenertem, 28,826 marurtem, 5,899 duplicate entries aser 2,166-i enumeration forms agütsütsü memulungertem lir.

SIR exercise kübok house-to-

house distribution aser enumeration forms digitization asütsüba anogo ka lia iba status report metetdaksüogo.

Meghalaya kübok district 12 nungi 10 nung enumeration forms 100% lemogo aser electoral district tulutiba East Khasi Hills nung registered voters 6,32,146 lir.

Manipur kübok Ukhrul nung postal bags 35 rongdoktsü**Imphal, July 28, 2026**

(Agencies): Manipur kübok Ukhrul district nung nisung telok kati National Highway-202 mokdangdang passports, ATM cards, letters aser tanga consignments abenba postal bags 35 rongdoktsüogo.

"Iba ya Hombarü Yaingangpokpi-Litan Road nung atalok. Postal bags 30 Ukhrul, pezü Somdal aser ka Kamjong atema liasü" ta Ukhrul Sub-Post Office Postmaster Wungreipam

Rimai-i ashi.

Department of Posts-i iba takoksa asadangdar aser kongshia aliba tesemtem nung postal services tenzüktsü meratem agidar.

Nisung telok kati NH-202 mokdangdang Shanghai Kuki village anasa truck convoy ka sot. Idangji parnokki Imphal nungi Ukhrul district headquarters-i belenba osettem rakatsü aser rongdoktsü.

Working Committee of the Kuki Civil Society Organisations

(CSOs), Ukhrul ajanga district nung rongsenketzüng mokdang ayonga agir aser parnokki India Post gari ka sotba shiogo.

Iba truck nung postal consignments den külemi aonsotsü aser grocery items bena liasü ta parnokki ashir saka mail bags rongdoktsüba indangbo kecha memetdaksü.

National Highway-202 ajanga Nagaland kübok Mokokchung aser Manipur kübok Imphal sendakteper.



Arunachal Pradesh kübok Dosing Village nung Dosing Kumku Clean & Green Village Mission tenzükdang agiba noksa ka angur. Iba mapa ya scientific waste management, environmental conservation aser sustainable rural development ajungkettsü atema lir. Member-Secretary (PR), Boleng office den Department of Environment, Forests and Climate Change, Government of Arunachal Pradesh kübok Pakke Declaration Secretariat Cell ajanga yaritepa iba mission tenzükogo.



China anüdoklen Jiangsu Province kübok Nanjing nung July 28, 2026 nü sanitation mapa inyaker tem temang mokongdaksüba süoshi agir aliba noksa nung angur. Tawa tsüngsang mopung kanga atsükba ajanga Nanjing yimti nung sanitation mapa inyaker nem 'cooling vests' semdaksür. Iba tula nung anatsülen fan tila inokba ajanga mopung telungi aitdaksür.

Hormuz atema Oman-i Iran den sentong ka lemsatep

Dubai, Chiteni/July 28 (Agencies): Strait of Hormuz amshiba atema 'voluntary fees' meshitsüba densema iba tesem ketdangsütsü asoshi Gulf linük temi bhukuba sentong ka Oman-i Iran den lemsatepogo, ta Gulf osang ka ajanga ashir.

Iran nunger osang ka ajanga ashiba agi, US-Israel nati Iran den raraba ajanga strait ajanga shishilempaba nung timtem ajurua aliba tembangtsü asoshi tamendak dak ka ama amshitsü Oman-i proposals agütsüba nung Tehran-i ano telangzüba magütsü.

US Tir Donald Trump-ia Iran den junga jembishinüba mapang lir ta ashi saka tangatettep kati marura asendenshir amaktsü ta amokmeren. Iran-i United States den jembishinü tenzükshitsü lenmang mebushir ta ashir.

Iran-i strait nung kanga junga soita aliba saladaktsütsü mechi Washington-i ita tetenzüklen asendenshir bomb pokloktsü tenzük, koba ajanga rara metenzükdang alima nung totzü aser liquefied natural gas shilem 20 shi bena liasü.

United States aser Israel nati February 28 nü nungi amakba ajanga Iran-i strait nung rong senzüba ajunga nokdang. Taoba ita US aser Iran tsüngta

tezüngzüktep ka yangluba ajanga iba tesem ya mapang tatsüka lapok, saka July tetenzüklen Iran-i memelaba channel amshiba rong tem dak amakba sülen tezüngzüktep ya raksa.

Iran-i strait ya Oman den külemi ketdangsüner ta shia lir, shiri tzükum külenji azüoker aser ibaji amshiba rong tem dang service fees meshir. Washington-i rara metenzükdang ama senotsü magütsüi rong tem sadem sadema iba tesem ajangdaksüner.

Oman-i proposal agütsüba kübok Iran kisüngi iba strait mazüoktsü aser fees ya pei mulungba nung agütsütsü shia lir, ta Gulf osang aser Western diplomats ajanga ashir.

Iba system ya Asia kübok Strait of Malacca nung amshiba ama alitsü, kong Indonesia, Malaysia aser Singapore-i navigation, libajen kumzüka ayutsü aser search-and-rescue operations atema rong tem dang pei mulungba agütsütsü ashir.

Tzü lenmang ajanga rong tem senzütsü temeden dak sendakba nung amalitep akangshitsü lenmang tem densema rara nung tang terenlok indang jembishinü akatsü atema Gulf Cooperation

Council foreign ministers tem Mongulbarnü video call ajanga ajurutepa liasü, ta Qatari Foreign Ministry ajanga ashi.

Raksar aliba rong tem nem Iran indang rongsen soita aliba agütsütsü sentong ka Trump-i benokba Iran indang joint military command-i magizük, ta ashir. Iba ama sen agizükba linük mesüra company tem Iran mitkari Strait of Hormuz ajanga mesenzüdaktsütsü ta ashi.

Aonung 13 tashi ashitena bomb pokloktsüba ajanga Tehran-ia Middle East nung US mitkartem alidak amakba sülen Trump-i hopta tatemlen anena liasü. US-i amakba anena ali tashi Iran-ia amakba anentsü ta ashir.

Iran-i telangzüba agüja kidanger linüktem nung US mitkartem alidak maka US sepai pezü tepset aser Gulf linüktem nung civilian infrastructure nunga amak aser ibai US-i civilian dak tenük yoker amakba mechi lir ta ashi.

Mongulbarnü Washington nung Israel Ato Kilonser Benjamin Netanyahu den senden ka amentsü lia, tang US jenjang tajungba nung lir, ta Trump-i ashi.

Pai Iranian targets timba nung amaktsü renema lir saka tang aji meinyaktsü meranger ta ashi.

Ukraine Tir Zelenskyy-i Trump den ajuruteper

Washington, Chiteni/July 28 (Agencies): US Senator Lindsey Graham asüpila sentong agitsü lia US Tir Donald Trump-i Mongulbarnü White House nung Ukraine Tir Volodymyr Zelenskyy pelashishia agizükogo. Russia den rara nung asür Lindsey Graham-i kanga tashiyim amshia Washington ya Kyiv bhukumdaksü.

Nikongdang Graham asüpila sentong agitsü lia Zelenskyy ya Trump den osangbener maden senden tatsüka amentsü imlar ta osang ajanga ashir.

US-Ukraine tesendaktep tajungba alidang mitkar teyari meshitsü asoshi tang Zelenskyy maongka tajung lir, ajisüaka Graham asüba ya Ukraine

asoshi takoksa tulu lir, shibai Washington nung Kyiv asoshi meranga jembia liasü.

Ukraine leniri Trump dang tang kanga nüngdaka aliba air defense tashi meshitsü aser drone tezüngzüktep renemtsü asoshi ajungshitsü. NATO senden nung Ukraine nem Patriot missile interceptors yanglutsü license agütsütsü Trump-i nangzükba indanga tena jembitsü amai lir. White House nung iba senden amenba sülen Zelenskyy ya US Capitol nung oa senators den senden ka amentsü imlar.

Russia-i missile amshia amakba nungi kumzüka alitsü asoshi nüngdakba nok-nü kanga ajema kumaka, Ukraine yaritsü

atema sen \$400 million mela aliba fiscal year 2029 tashi mamshimatsü ta Trump administration-i Congress dang ashiba shiti ka Pentagon nungi ozüing yanglurtem dangi yoker aliba mapang Zelenskyy-i semdang alitsü.

Taoba küm party anaprong nungi züngsem temi bhukuma agizükba Kyiv asoshi teyari Pentagon-i soita ayuba atema Democrats aser Trump'er külem Republican züngsem kari aitsüogo.

Trump kümsük tanabuba tenzüklen Zelenskyy tena aiben mangatettep adoka liasü, saka rara nung Ukraine takok tuluba akumba sülen tang tena tsüngta tesendaktep tajungba nung lir.

US nunger MP anati Pak Army chief Asim Munir den ajurutep

Islamabad, Chiteni/July 28 (Agencies): Islamabad aser Washington na bilateral tesendaktep akangshitsü merangba mapang US nunger ozüing yanglur anati Pakistan Army tekolakba Asim Munir den Rawalpindi nung ajurutepogo.

Senden ya Hombarnü Rawalpindi kübok General Headquarters nung mena liasü, ta Pakistan' military media wing, Inter-Services Public Relations (ISPR)-i sangdong ka ajanga metetdaksü.

Montana nungi congressmen Ryan Zinke aser Washington nungi Michael Baumgartner nati Field Marshal Munir den ajurutepba mapang linük ana tejangraba, bilateral defence cooperation aser rongsenketzüng nung longjemer inyaktsü atema onük balala benoka sensaksema liasü.

Tir Donald Trump tanaben tir akümba sülen US aser Pakistan na yimden yimsüsüba, defence aser rongsenketzüng dak sendakba nung asendenshir tesendaktep yanglushiba mapang tang Republican MP ana yagi Pakistan semdangogo.

Kasa mapang nung US aser Iran na rara adoker aliba mapang Pakistan teyongtsüi ia sensaksemja arudar. Linük ana tsüngda ceasefire benoker aliba chirepba sülen Islamabad-i maneni Washington aser Tehran naprongla den sensaksema arudar.

Munir-i, rongsenketzüng dak sendakba nung Pakistan nung inyaktetsü aliba maparen balala indang US nunger MP tem nem metetdaksü aser parnok meketa aliba tesemtem süngjema ali nungdang rongsenketzüng, shishilemba aser regional connectivity atsülangyonga otettsü, ta ashi.

Paisa, Pakistan nung tang inyakyim melenshiba indang metetdakja liasü, koba shishilembatsü atema tayongba kümdaktsütsü aser bendangertem nem sen entokdaksütsüba dak rangloker lir, ta ashi.

US nunger MP ana yagi linük ana tsüngda rongsenketzüng, commercial aser riju balala tesendaktep tajungba küma ajungkettsü atema parnok bendanga agütsür aliba lemsatepa liasü.

Japan kübok Kyushu tesem nung menoknok tesashi ka anok

Tokyo, Chiteni/July 28 (Agencies): Mongolbarnü 7.1 magnitude tesashi menoknok ka agi Japan kübok Kumamoto prefecture kongshia nisung aliba ki aika ka raksatsü, rail service tem anendaktsü aser tsunami aser aftershock tem agi kongshitsü ana nung aliba indang tekümdangtsü metetdakja liasü.

Menoknok ajanga shopping mall ka nung langka apokba sülen nisung aika sür alitsü aser aika sabanger alitsü ta bilemer ta osang agütsüba mapang tashi nung police-i metetdaksür liasü.

Kasa mapang nung mozüki kati nisung 50 dak tema yiruba onsang agütsüogo, ta public broadcaster NHK sangdong ka ajanga metetdaksü.

Nisung 300,000 shi dang evacuation centre temi aotsü tetuyuba agütsüogo ta disaster management agency-i ashi, aser kasa mapang nung PM Takaichi-i ashiba agi, lendong agi kongshir alirtem nem teyari agütsütsü atema sepai 3,600 yokogo.

Alima nung chip yanglur rongnung tulutiba Sony amala densema company tulutem indang plant menoknok anaokba tesem temeket nung amenoka lir.

Sony otongdar kati ashiba agi, company-i tensa kanga junga asadangdar. TSMC danga ken o jangjanüa ashishia saka kecha telangzüba magütsü.

Japan sorkari Kumamoto,

Nagasaki, Kagoshima, Fukuoka, Saga, Oita, aser Miyazaki prefecture tem atema menoknok anoktsü ana nung aliba asoshi tekümdangtsü metetdaksür liasü. Item prefecture tem ajak ya Japan south len Kyushu asetkong nung amenoka lir. Menoknok anokba sülen ano meter ka talang tsunami arutsü akok ta metetdaksüogo, ta Japan Meteorological Agency-i ashi.

Japan ya alima nung menoknok kanga anokba linüktem rongnung ka lir aser minute pongushia tremor ka bo ajangshir. Linük ya "Ring of ?Fire" nung amenoka lir aser alima nung magnitude 6.0 mesüra iba dak tali tesashiba anokba menoknok shilem 20 bo Japan nung anoker.

Küm ter tejakdang Kumamoto nung menoknok ka anokba sülen nisung 275 tepset aser nisung 2,739 yiruja liasü, ta ketdangsürtem data ajanga sayuogo.

Kyushu Electric Power-i ashiba agi, menoknok anokba sülen ki 40,000 shi nung power maka kümogo.

Kasa mapang nung Railway company JR Kyushu-i ashiba agi, parnoki high-speed bullet train tem densema rail service tem sota yua lir.

Ajisüaka iba tesem nung amenoka aliba nuclear power station tem nungbo timtem adokba osang kecha mali, ta Japan indang nuclear regulation authority-i metetdaksü.

Zidane France national team head coach kumogo



Chiteni/July 28, 2026 (Agencies): Taoba mapang Real Madrid manager Zinedine Zidane, France national team head coach kumogo.

France manager talangtiba inyaksang Didier Deschamps-i kum 14 sülen mapa toktsüogo. 2026 World Cup semifinal nung Spain menoki tsükba sülen pai coach mapa tokja liasü.

Zidane, shiba 1998 kum World Cup akokba France team nung dena liasü, pai 2021 kum Real Madrid coach mapa toktsüba sülen pa club mesüra team kecha dena sendaka maliasü.

Arishi kum 54 tain coach shiba France nunger asayartem rongnung tajungtiba ka ta

züngshir, pai 2030 World Cup qualifiers tashi atema tenangzüktepba yanglutsü.

Coach asütsü shimba indang jembiba mapang pai, "France national team anitsü ya kanga nemadangsü ka lir, ta ashi.

"Ni French national team dang nungi tuluba kecha mali ta shia aruogo. Anungji French national team manager akümba ya tepelatsü aser nemadangsü ka lir," ta pai shisem.

"Iba ya khuret ka lir. Ni French Football Federation tir Philippe Diallo, executive committee aser French Football Federation dang kü dak tamang kaketba atema pelaba lemsateper aser Didier aser pa indang staff-i kum 14 tashi

meranga inyakba asoshi tenüngsang aser tetushi agütsür," ta paisa shisem.

Kasa mapang nung Diallo-i head coach tasenba ya French football nung "legend" ka ta ashi.

"French national team head coach mapa abentsü atema Zinedine Zidane shiba ya French Football Federation atema nemadangsü tulu lir," ta pai ashi.

Taoba coach Deschamps lenisüba nung kum 14 tsüngda France team-i tongtibang asayamung asem kokogo. Pa lenisüba nung team-i 2018 kum World Cup dena koka liasü.

Zidane lenisüba nung France team mezüngbuba asaya Nations League nung September ita 25 nü Turkey den asayatsü.

2006 World Cup sülen Zidane asaya nungi anen aser 2014 kum Real Madrid Castilla team coach aküm. Iba sülen pa 2016 kum January ita first team manager aküm aser iba season Champions League koka liasü. Pa lenisüba nung club-i 2016-17 La Liga akok, saka iba sülen pai mapa toktsü.

Ajisüaka Zidane ya ano 2019 kum meyipa aru aser 2019-20 season nung Spanish league title bena liasü. Maneni pai 2020-21 campaign sülen club toktsü aser iba sülen coach mapa khen danga inyaka mali.

Sri Lanka den Test asaya atema India squad shimogo

Chiteni/July, 28, 2026 (Agencies): Ajit Agarkar lenisüba nung India tebur team selection committee-i Mongolbarnü Sri Lanka den Test asaya ana atema shimba asayar 15 tenüng sangdongogo. Iba asayamung ya Galle nung August 15 nü tenzüksü.

Afghanistan den Test ka asaya nung masayadaksüi anisüngzükdaksüba sülen all-rounder Ravindra Jadeja meyipa aruogo aser off-spinner Saransh Jain-a tang mezüngbuba squad nung züngoksemogo. Ajisüaka Washington Sundar bo Test nung masayatetsü.

Sai Sudharsan aser Jasprit Bumrah naprongla squad nung züngoka lir, saka BCCI Centre of Excellence (CoE)-i tena atema fitness clearance agütsü nung dang asayatetsü. Iba dak alaka team nung taoba mapang asayartem dang shima lir. Bowler tem rongnung Mohammed Siraj, Prasidh Krishna, Bumrah aser Gurnoor Brar nunger densema lir.

Spin department ya Ravindra Jadeja aser Kuldeep Yadav nati anir asayatsü imlar, kong Manav Suthar aser Saransh Jain nata densema lir. Suthar-i Afghanistan den asayaba mapang kanga junga asayaogo

aser Washington Sundar masayaba mapang Jain ya specialist off-spinner asütsü.

Arishi kum 33 tain asayar ya First-Class asayar 54 asayar lir aser pa ya asayar shimertemi mapang talangka asadanga aruogo. Pa ya tawa Sri Lanka nung India A team nungia asayaogo aser iba mapang pai wicket trok agi aser tatembangbuba asaya nung out mesüi run 70 yanglua liasü.

Kasa mapang nung selector temi Sudharsan aser Bumrah na ya kanga junga taneptsü mongui lira masayadaksüner. Bumrah mezüngbuba Test mapang tashi nungbo taneptsü ngur alitsü imlar, saka pa tera danga temulung melemi bilemra masayadaksütsü.

India team August ita mezüngbuba hopta Sri Lanka-i aotsü imlar. Parnok August 7 nü nungi tenzüka Colombo nung warm-up asaya ka asayatsü.

Sri Lanka den Test atema India squad: Shubman Gill (C), KL Rahul (VC), Yashasvi Jaiswal, Rishabh Pant (WK), Sai Sudharsan*, Dhruv Jurel (WK), Ravindra Jadeja, Kuldeep Yadav, Manav Suthar, Jasprit Bumrah*, Mohammed Siraj, Prasidh Krishna, Gurnoor Brar, Devdutt Padikkal, Saransh Jain.

Djokovic aser Sabalenka na US Open Mixed Doubles asayatsü

Chiteni/July 28, 2026 (Agencies): Novak Djokovic aser Aryna Sabalenka na taküm US Open mixed doubles tournament nung külemi asayatsü, koba taoba season benokba kasa format nung asayatsü.

Serbia nunger nüngtugu asayar aser tetsürtem rongnungi world number one asaya ya August 17 nü entry deadline matong tsüngda züngoksemogo, aser tena ya rankings ajanga shimba tarep trok rongnung densema lir.

Iba list nung tebur world number one Jannik Sinner aser tanabuba jenjang nung alisang Carlos Alcaraz na mali.

Sinner, shiba taoba kum tarep temeyoktep asaya nung masayai liasü, pa US Open masaya tsüngda temang anepalua atatsü asoshi rangloker lir, aser ibayongji pa Canadian Open nunga masayatsü telemteba agiogo.

Alcaraz shiba 2015 kum Emma Raducanu den külemi asaya liasü, pa tekanük yiruba tang tashi anepaludar. Iba timtem ajanga pa taküm French Open aser Wimbledon naprongla nung masaya.

US Open-i taoba kum tarep temeyoktep asaya nung temelenshi tulu ka bener arua liasü. Temaba jenjang nung asayaba kija asayartem atsüa arutsü nükjidong nung iba temelenshi benoka liasü. Iba format kübok tetenzük len asayatem tatsüba asayar aser asayamung ajunga ya kija asaya metenzük tsüngda anogo ana lia asayar.

2026 kum iba asayamung ya tetsür aser tebur kija asaya metenzük tsüngda anogo pongu jelia August 25 nü tenzüksü.

Italy nunger tarep asayar Sara Errani aser Andrea Vavassori nata tena indang title defend asütsü züngoksemogo. Iba asayamung akoker nem senpet USD million 1 agütsür. Taoba kum iba format aitsüba tarep rongnung tenata densema liasü.

Ajisüaka US Tennis Association CEO Craig Tiley-i, iba asayamung indang structure puküma jembu aser nüngtugu asayartem pelashishia agizüka liasü. Maneni team ti nem wild card agütsütsü aser August 24 nü team ti qualifying asayaba sülen tarep ana main draw-i aitsü.

CWG 2026: Para Athletes Sharmila Dhankar-i gold medal angu



Chiteni/July 28, 2026 (Agencies): Tang asaya aliba Commonwealth Games 2026 nung Sharmila Dhankar aser Shilpa K Shyla nati tetsür Shot Put F57 final nung gold aser bronze medal ngua India atema ano medal ana ngutsüogo.

Sharmila-i 9.81m onteta gold medal angu. Lai gold medal anguba ya kum 20 sülen India nunger Para Athletics kati CWG nung medal ka ngutetba asütsü. Shilpa-ia takok tashi meranga asaya aser 7.26m onteta bronze medal nguogo.

Shilpa ya shitakbabo pezübuba nung tembanga liasü.

Nigeria tsür Eucharía Iyiazi-i mezüngbo bronze medal ngua liasü saka review ka asüba sülen magi aküm. Iba telemteba agiba ajanga Shilpa tasembuba jenjang nung tembang aser medal ya ngutetogo.

Sharmila shiba August 15 nü arishi kum 40 ajungtsü, la Rewaria, Haryana nung aso aser arishi kum ana asüba mapang polio agi tonga liasü.

La iba asaya ya kinungba Ajit Singh ajanga asaya. La 2020 kum nungi asaya tenzüka liasü. Iba sülen kum ka lir lai National Championship akok.

Arishi kum 37 tain Shilpa shiba Eshan S.D den training agir, la arishi kum pezü asüba mapang lendong ka ajangshiba sülen tetsüng anaprongla rangtoktsüsa aküm. Lai 2026 kum Commonwealth Games nung bronze medal anguba ajanga la temulungtetba sayur.

Kasa asayamung nung Sarvesh Kushure-ia Hombarnü Scotstoun Stadium, Glasgow nung tebur High Jump asaya nung silver medal ka nguogo. Iba medal ya India asoshi medal tenetbuba aser outside Athletics atema mezüngbuba medal liasü.

Sarvesh-i gold medal ngur lila saka countback rule ka ajanga pai gold mongutet. Pa aser Romaine Beckford napronglai 2.25m jukteta liasü. Ajisüaka Jamaica nunger asyar yagi gold angu kechiyong pa dang nungi Sarvesh-i timbaben merangdanga liasü. Beckford-i pezüben ajok aser Shankar-i ponguben joka liasü.

Sarvesh ya CWG puti otsü nung India nunger asayartem rongnung high jump asaya nung medal anguba tanabuba asayar kumogo. Tejasvin Shankar-i 2022 kum Birmingham nung bronze medal ngur liasü.

BILEMDANGANG

"Aremzüka ataba nung temaotsü lir."